

Pergerakan Theosofie dan Pemimpinnja.


Oleh kerna pergerakan Theosofie, jang sabagian besar azas-azasnja ada didasarken atas Buddhisme, ada tjetjok dan malah bisa bergandengan dengen gerakanja Sam Kauw, sedeng di Batavia tiga Theosoof-Indonesier, jaitoe Toean-toean R. Soekirlan, R. Kadiroen dan R. Soetardjo, biasa adaken lezing lezing dengan telep dalem krenteng Kwan Im Tong dan di Tiong Hoa Hak Tong Tanahabang, maka kita pikir ada baeknja aken moeat gambar gambar pemimpinnja itoe pakempoelan dan toetoerken djoega ini dan itoe tentang Theosofie poenja tindak-tindakan jang belakangan.

Sadari wafatnya Dr. Njonja Annie Besant di taon 1934, telah dipilih Dr. Arundale, salah-satoe pembantoe jang tjakep dari Dr. A. Besant, sabagi penggantinya, jaitoe djadi President dari antero pergerakan pakempoelan Theosofie di seloeroeh doenia. Dr. Arundale djadinja ada President jang katiga dari itoe pergerakan. Jang pertama ada Kolonel Olcott dan jang kadoea ada Dr. Njonja A. Besant.

Sabagi penoelis boekoe boeat menerangken ilmoe Theosofie, Dr. Arundale ada kalah djaoe dengan Dr. A. Besant, Bisschop C. W. Leadbeater, Mr. Jinarajadasa, dan beberapa pamoeka laen. Tapi sabagi pengendja dan pengatoer gerakan, begitoepoen mendjalanken propaganda, ini President jang sekarang telah oendjoek kgiatan jang djarang terdapat bandingannja.

Sadari di bawah pimpinan Dr. Arundale, pergerakan Theosofie kena alamken toefan dan ingin riboet, kerna boekan sadja di dalem ada terbit pemetjahan antara leden, jang sabagian menjetoedjoei peladjaranja Krishnamurti dan sabagian lagi lebih ketarik pada Vrije Katholieke Kerk, tapi djoega dari adanja penindesan oleh kaoem Fascisten di Europa jang tentangin sasoeatoe pergerakan jang hendak adaken persoedera'an dan hak sama-rata antara segala bangsa. Lodjilodji di negri-negri jang dikoesain oleh kaoem Nazis dan Fascist telah ditootoep dan diboebarken, hingga

itas gerakan djaat semingkin tjoet. Terhadep ini sawmoea kasoekeran dan rintangan Dr. Arundale telah bekerdja dengan gagah dan giat; dari Adyar, Madras hoofdkwartier dari Theosofie, tida berentinja dikirim instructie pada tjabang-tjabang di seloeroeh doenia boeat bekerdja dengan lebih keras lagi.



Dr. George Sydney Arundale, President Katiga dari Pakoempoelan Theosofie boeat seloeroeh doenia

Salama hari-hari raja Goede Vrijdag dan Paschen, Pakoempoelan Theosofie di Hindia Olanda bakal adaken congres besar di Blavatsky Park, Batavia Centrum. Programmanja jang ringkes ada seperti di bawah iai :

Djoemahat, 22 Maart, djam 10 pagi : Rapat Theosoof Moeda. Djam 7 malem : Receptie dan Pemboeka'an Congres.

Saptoe, 23 Maart, pagi : Lezing-lezing Congres. Djam 8 malem : Peraja'an.

Minggoe, 24 Maart, djam 10 pagi : Rapat Taonan.

Senen, 25 Maart : Excursie.

Sam Kauw Gwat Po.

三教月報

ORGAN DARI BATAVIA BUDDHIST ASSOCIATION,
SAM KAUW HWE BATAVIA MENADO,
DAN TELOKBETONG.

ISINJA INI MAANDBLAD ADA DIQEROES DAN DITANG-
GOENG OLEH REDACTIE „MOESTIKA DHARMA.”

Harga abonnement per kwartaal f 0,75. Pembajaran dimoeka. Kaloe berlangganan dirangkep sama Moestika Dharma atau Moestika Romans boeat ini maandblad tjoemah tambah per kwartaal f 0,50. Harga advertentie boleh berempoeck.

Kantoor Redactie Administratie: Tjitjeroeg, Preanger.

Beladjar dan Mengadjar.

Pendoedoek Tienghoa di Indonesia jang bisa batja dan mengarti kitab-kitab klassiek Tionghoa, apalagi jang dapet pendidikan dalem sekola-sekola Tionghoa koeno sabelonnja diberdiriken Tiong Hoa Hwe Koan, kabartjakan ada termasoek pada golongan Khong Kauw, sedeng jang biasa memoedja di krenteng pada Dewi Kwan Im dan laen-laen Toapekong ada termasoek pada golongan Hoedkauw atawa Tookauw dengen tergaboeng, sedeng kaoem Khongkauw poen banjak djoega jang mempoenjai itoe doe matjem kapertjaja'an — Hoedkauw dan Tookauw — hingga de-nge n begitoe iaorang djadi memelok *Sam Kauw*.

Dari sebab ini Tiga Agama soedah dianoet oleh bangsa Tionghoa sadari riboean taon jang laloe, maka boleh djoega dibilang sabagian jang paling besar dari bangsa Tionghoa di Indonesia sadari doeloe ada djadi penganoet salah-satoe diantaranja atawa poen sama sekalih. Salandoetnja, orang loear jang tida taoe nis-tjaja nanti mengira di antara itoe sakean banjak pe-

nganoet moesti ada terdapat sadjoemblaah besar orang-orang jang mengarti dan faham betoel selak-seloeknya itoe Tiga Agama; boekan sadja oepatjaraan, tapi djoega jang berhoeboeng dengan peladjaran philosophie dan toedjoeannja, pengartian mana dikira marika selaloe berdaja aken bikin tersiar dan kasih mengarti pada laen-laen orang jang belon taoe.

Ini pengira'an ada dengen sawadjarnja kapan meliat kagiatan dan tjara bekerdjya dari penganoetnya laen-laen agama, jang dengen dipimpin oleh pendita-pendita dan goeroe-goeroenja, selaloe djalanken propaganda boekan sadja antara kaoem sendiri tapi djoega oentoek perkenalken itoe agama pada orang loear. Tapi dengen gerakan Sam Kauw di Indonesia tida begitoe. Itoe sakean banjak penganoet dari Hoedkauw dan Tookauw tjoemah perhatiken pamoedja'an dan oepatjara sembahjangan sadja, tjoemah sedikit sekalih jang peladjarin Buddha dan Loo Tjoe poenja philosophie oentoek mentjari katentreman dan penerangan, sedeng golongan Khong Kauw jang faham kitab-kitab klassiek dari Khong Tjoe, dan jang djoemblaahnja boeat di Indonesia boleh dibilang tida sedikit, pada tiga atawa ampat poeloeh taon laloe djarang sekalih jang maoe berchoébah aken terangken dan siarken itoe peladjaran di moeka oemoem, dan malah sekarang poen jang betoel-betoel bekerdjya giat dan tetep boeat menjiarken Khong Kauw djoemblaahnja boleh di-itoeng sama djeridji tangan. Di Batavia, sabagitoe djaoe jang kita taoe, tjoemah ada doea, di Bandoeng tida lebih dari satoe; di Solo ada satoe atawa doea, dan di Soerabaja ada doea atawa tiga. Jang laen-laen kabanjakan tjoemah toeroet nimbroeng boeat saliwatan kapan ada karaja'an atawa perhimpoenan jang dikoendjoengin oleh banjak orang, sakean boeat bantoe merameken atawa kasih denger soeara, dan komoedian tida ada kabar-kabarnja lagi.

BELADJAR DAN MENGADJAR.

Boeat adaken chotbah-chotbah jang tetep satiap ming-goe atawa poen satiap boelan satoe kalih, djarang ada jang soedi, maski djoega marika „djoengdjoeng tinggi” pada Khong Tjoe dan, kaloe bitjara, biasa memoedji satingga langit pada Khong Kauw.

Sabagi lantaran dari ini sikep mandek dan ogah-ogahan, marika biasa madjoeken doea alesan: *tida ada tempo dan tida poen ja kapandean*. Ini alesan jang belakangan ada paling sering terdenger, brang-kalih lantaran see-dji atawa maloe maloe, atawa *poen takoet* ditjelah orang, atawa betoel-betoel merasa tida sanggoep.

Sekarang kita maoe bitjaraken sadja penolakan lantaran takoet ditjelah sebab merasa tida sanggoep atawa tida poenja kapandean.

Memang betoel soeal berchotbalı atawa berpidato ada teritoeng ilmoe kapandean jang tida terlaloe gampang didapet, kerna salaennja haroes mengarti apa jang dichotbahken, si pembitjara poen koedoe kenal ilmoe bahasa soepaja bisa omong rapih, soearanja terang dan njaring, serta hatinja poen tabah. Pendek-nja kapandean bitjara di moeka oemoem tida bisa diampoenjai oleh sembarang orang, dan boeat berhatsih bagoes orang haroes mempoenjai aanleg atawa pembawa-djadi, menoeroet watek jang soedah sedia koetika terlahir.

Aken tetapi haroes djoega di-inget, sabetoeñja bangsa Tionghoa boekan teritoeng pada golongan pendoedoek jang tida poenja kapandean boeat bitjara bagoes dan menarik. Sabagi pedagang atawa pendjoeal barang, lelaki atawa prempoean banjak jang sadari ketjil soedah pinter adoe dan poeter lidah, kerna djikaloe koerang bisa omong, atawa koerang „grè-tjèk”, kata orang Soenda, dagangannja poen koerang lakoe. Adanja ini kapandean bisa diliat kapan ada pesta atawa perhimpunan besar, pendirian pakoem-

poelan, congres, pesta peringatan, jubelium pakoem-poelan (biarpoen tjoemah pakoempoelan ketjil oentoek orang orang moeda), pesta derma dan sabaginja, selaloe moesti sadja ada sadjoemblah orang jang getol yanswat ganti-berganti, zonder disoeroe, diboedjoek dan diandjoevin lagi. Dari sini bisa diliat bahoea bangsa Tionghoa sabetoelnja tida terlaloe miskin atawa kakuerangan orang jang tjakep berchotbah atawa berpidato. Maka djikaloë dalem pergerakan kabatin-an tjoemah sedikit sekalih orang jang berani madjoe ka moeka maski hatinja *setoed joe* dan *soedjoet* pada itoe Agama atawa Peladjaran, inilah tandanja betoel-betoel antara itoe djago-djago yanswat ada banjak jang *djerih* boeat oetarakèn pikirannja di moeka oemoem lantaran merasa pengartiannja belon tjoekoep hingga koeati ditjelah dan ditertawain orang kapan bitjara keliroe atawa menjasar djaoe.

Ini sikep see-dji, berhati-hati, memang ada sifat jang haroes dipoledji, kerna siapa sembarang njeroedoek, atawa soeka sekalih nimbroeng boeat bitjaraken apa jang ia tida mengarti, tjoemah membikin si pendenger djadi djengkel dan djemoe. Ada lebih baek tinggal boengkem dari-pada lahirken pikiran jang katjo-belo dan tida karoean djoentroengannja. Inilah ada sikep dari satoe *koen-tjoe* atawa saorang jang sopan-santoen.

Aken tetapi sedeng ini pikiran moesti diakkoe dan tida bisa disangkal lagi kabenerannja, haroeslah diinget djoega, bahoea satoe sikep atawa perboeatan jang *betoel* bisa djoega djadi *salak* kapan digoenoaken boekan pada tempat dan tempo jang tjtjok. Oepama saorang jang boekan dokter dan tida mengarti ilmoe obat-obatan, ada betoel sekalih aken djangan menggretjok kapan si sakit soedali dapet pertoeloengan atawa ada dalem rawatannja thabib-thabib jang pande; tapi kapan itoe achli mengobatin belon sedia dan si sakit atawa si loeka tida ada jang perdoeliken, ada

BELADJAR DAN MENGADJAR.

djadi kawadjibannja saorang sopan dan menjinta sama manoesia boeat menoeloeng apa jang ia bisa maskipoen pengartiannja tjéték atawa masih belon menjoekoepein.

Begitoe poen dengen pergerakan kabatinan. Djikaloe soedah tersedia achli-achli jang faham dan pande berchotbah, memang betoel sekalih kapan orang-orang jang koerang mengarti djangan gegabah toeroet bittjara atawa kamoekaken diri; tapi dimana orang jang boeat djadi propagandist atawa penjiar masih terlaloe koerang, hingga itoe gerakan bisa mandek atawa koebra lantaran tida ada jang pimpin, adalah menjadi kawadjiban dari orang-orang jang djiatsiem dan soedjoet boeat madjoe ka moeka salagi menoenggœ sampe dapet kawan kerdja jang lebih pande dan tja-kep boeat didjadiken pimimpin.

Laen dari itoe dalem soeal peladjaran batin, jang oemoemna terbagi dalem banjak tingkatan, ampir tida ada satoe orang jang boleh dibilang soedah tjoekoep sampoerna kapandeannja. Khong Tjoe sendiri dalem *Loen Gie* bagian Katoedjoeh fatsal XXXIII, ada bilang, bahoea ia tida berani bandingin dirinja dengen satoe Sengdjin, dan tjoemah bisa bilang sadja jang ia berichtiar dengen tida merasa bosen boeat bikin dirinja djadi saorang jang sampoerna, mengadjar dengan tida merasa tjape pada laen-laen orang soepaja soeka bergoelet boeat dapetken itoe kasampoerna'an.

Maka itoe alesan „belon tjoekoep kapandean“ tida bisa digoenaken dalem soeal menoeloeng laen-laen orang boeat dapet pengartian jang besfaedah kapan di sabelah kita tida ada kawan jang lebih pande dan boleh diandelin boeat toeroen tangan. Djikaloe sampe terjadi kakeliroean jang boekan disengadja — tjoemah lantaran pengartian masih serba koerang — itoelah boekan satoe kadosa'an, kaloe sadja maksoed dan toedjoean kita ada baek dan soetji, boekan bersifat

kouwkati atawa hendak oetamaken diri sendiri. Kapan maoe dipilih jang pande dan faham betoel, nistjaja 95 % dari propagandist dan toekang-toekang berchotbah dari berbagi-bagi agama atawa peladjaran batin jang tersiar di Indonesia moesti oendoerin diri, kerna kabanjakan jang pengartiannya masih rendah dan tjoepet.

Ada lagi satoe kabeneran jang kita hendak oendjoek disini.

Pengartian batin, seperti djoega laen-laen ilmoe kapandean jang meminta tenaga pikiran, tjoemah djadi madjoe dan terboeka lebar kapan didjalanken dalem practijk. Dengan membandingin sama pengalaman jang diketemoein sahari-hari orang nanti dapat tambah banjak pengartian jang tida bisa diampaenjaï kaloe tjoemah batja dan fahamken boekoe-boekoe atawa ingetin di loear kepala segala oedjar-oedjarnja. Dan siapa mengadjar pada orang, ia sendiri ada toeroet beladjar, sebab dalem pertjoba'nnja boeat beriken keterangan dan pametjahan soepaja si pendenger bisa mengarti, ia terpaksa moesti fahamken itoe peladjaran dengan giat dan soenggoe soenggoe, pada waktoe mana pengataoeannja soedah pasti aken bertambah banjak sekalih, hingga apa jang doeloean tjoemah terbajang samar-samar, aken tertampak dengan djelas, samentara berbareng dengan itoe ia nanti dapat djoega pengartian-pengartian baroe, sabagi hatsil dari pertjoba'nnja boeat menjelidiki lebih dalem.

Djadinya sabelon itoe orang-orang jang dengerin ia berchotbah dapat kaoentoengan dengan tambahnja pengartian, ia sendiri soedah petik hatsil lebih doeloe dari itoe pakerdja'an. Sedeng dari loear, jaitoe di lahir, kaliatannja seperti ia *mengasih*, di batin sabetoeñja ia *menerima*. Inilah ada gandjaran atawa oepahan jang natuur biasa beriken pada siapa jang giat menoeloeng dan memberi peladjaran baek pada orang

Buddha poenja Ampat Kabeneran Moelia.

TENTANG DELAPAN DJALAN OETAMA.
bagian

PERINGETAN BENER.
XLV.

OLEH KWEE TEK HOAIJ.

(*Lezing dari Batavia Buddhist Association di Klen-teng Kwan Im Tong, pada tanggal 7 September 1939 djam 8,15 sore*).

Soedara-soedara,

Dengen girang di ini malem saja biasa moelai mem-bitjaraken itoe Delapan Djalan Oetama jang Katoedjoeh, jaitoe jang dinamaken Peringetan Bener dan tjara Sanskrit diseboet *Samyag Smriti*.

Maskipoen dari itoe Delapan Djalan ini Peringetan Bener ada termasoek jang katoedjoeh, menoeroet kate-

dengen hati djoedjoer dan tida kandoeng maksoed kouwkat. Khong Tjoe tida nanti djadi begitoe besar kapan ia tida giat mengadjar laen-laen orang — kapan ia simpen pengataoean jang ia dapet boeat dirinja sendiri sadja; dan begitoe poen dengen laen-laen Nabi atawa Goeroe dari kabidjaksana'an.

Maka itoe kapan penganoet jang giat dan soedjoet pada satoe agama atawa peladjaran batin jang belon saberapa terkenal dan tida poenja penjiar jang tjakep, samoea mengkérêt boeat madjoe ka depan lantaran anggep „pengartian belon tjoekoep“, nistjaja selamalamanja *tida bisa* ada kamadjoean, baek bagi itoe gerakan atawa pakoempoelan, baek poen bagi penganoet atawa ledennja sendiri.

Maka madjoe dan bertindaklah dengen hati tabah !

Maksoed dan toedjoean baek moesti di achirnja memberi hatsil jang *baek* djoega !

rangannja Bhikkhu Silacara, ini satoe ada jang paling penting sendiri dari samoea Djalanan jang laen zonder ada katjoealinja. (It is in reality the most important of them all without exception). Sebabnya dibilang begitoe adalah dari lantaran, sedeng itoe Djalanan-djalanan jang laen, lebih atawa koerang, hanja sabagi tempat melintas boeat orang bertindak lebih djaoe akan sampeken pada laen apa-apa jang lagi ditoedjoe, atawa pembantoe boeat mentjapei apa jang beräda lebih djaoe, tetapi ini satoe, Peringetan Benér, ada beroepa perdjalanan atawa atoeran hidoepl jang sendirinja *soedah sampoerna*, tida bergantoeng pada laen apa-apa lagi. Tentang ini Peringetan Benér, Buddha ada ma-loemken bahoea, djikaloe orang djalanin dengan soenggoe-soenggoe dan kagiatan penoeh boeat toe-djoeh hari sadja lamanja teroes-meneroes dengan zonder berentti, ia nanti bisa sampe pada kasedaran atas sifat jang bener dari dirinja sendiri dan dari segala apa jang beräda di sapoeternja, dan dengan itoe kasedaran ia nanti bisa bikin berächir samoea karapelannja pada segala apa sadja jang ia dapat liat, denger atawa pikir, dan dengan begitoe mendjadi terbebas dari *samoea iketan* boeat selama-lamanja.

Ini keterangan, soedara soedara, pastilah ada mengedjoetken, kerna itoe tempo toedjoeh hari jang digoenaiken boeat menimbang, memahamken dengan giat dan soenggoe hati pada sifatnja ini djalanin, kaliatan ada terlaloe pendek boeat mendapat hatsil jang begitoe besar. Tetapi inilah ada dari lantaran kabanjakan orang sabenernja *tida taoe* apa jang dinamaken Peringetan Benér — tida mengarti bagimana moesti bertindak ka ini djoeroesan — hanja ingetannja selaloe terlipoet oleh kasesatan, kamaya'an (illusie) dan kagelapan teroes-meneroes, lantaran mana maski ia terlahir sampe *toed joeh poeloeah kalih* ka doenia, itoe Peringetan Benér ia masih belon bisa geenjaken.

LEZING-LEZING DI KWAN IM TONG.

Tetapi kapan satoe kalih itoe kasedaran soedah moen-tjoel dalem dirinja, dengen djalan memikirin dan menjelidikan dengen ketetapan hati dan kagiatan penoeh boeat toedjoeh hari zonder berenti, itoe antero pengartian jang terboengkoes dalem Peringatan Bener ia bisa lantes poenjaken. Malah Buddha soedah dapat itoe Wahjoe atawa Penerangan jang sapenoehnja tjoemah dalem *samaleman* sadja salagi doedoek tepakoer di bawah pœhoen Bo.

Tetapi boeat kita-orang, jang masih penoeh tjetjat dan kakeongan, jang masih merampa-rimpi di tempat gelap boeat mentjari djalan jang menoedjoe pada itoe sinar terang, soedah tentoe tida oesah harep nanti bisa madjoe begitoe tjepet; lebih baek kita djangan pikirin dalem tempo berapa lama kita bisa indrek itoe Djalanan Katoedjoeh — bisa poenjaken itoe Peringatan Bener dengen sapenoehnja, sebab — saja maoe peringketen disini — sedeng kafaedahannja ada besar, kasoekerannja boeat saorang biasa aken mengindrek itoe Djalanan poen amat besar. Tapi inilah boekan saja maoe bilang itoe permaloeman dari Buddha ada kœrang bener. Batin manoesia ada satoe barang aneh jang soeker didjadakin. Kaloe lagi poeles, mogok atawa mandek, saoemoer hidoepl itoe orang tida bisa dapat kamadjoean maski sadjari; malah ada djoega jang sampe beberapa kalih kalahiran, jang mengambil tempo riboean taon, tida bisa mendapat kamadjoean jang kentara. Tapi kapan satoe kalih terima emposan atawa andjooran jang bener, atawa satoe kalih ia moelai sedar, lantes sadja bisa melompat madjoe dengan begitoe pesat hingga melombain banjak laen-laen orang jang tadinja kaliatan soedah berdjalan djaoe di depannja.

Ini ka'anehan disebabken lantaran pengartian batin ada berbeda tjara dan atoerannja dengen peladjaran boeat dapetken pengataoean doenia. Dalem sekola-sekola oepamanja, itoe peladjaran ada terbagi dalem

beberapa klas jang atoeran dan boekoe-boekoena berlaenan, menoeroet satoe soesoenan jang tentoe. Saorang moerid, biarpoen jang bagimana radjin beladjar dan tadjem otaknya, tida bisa melompat dari klas I ka klas III zonder liwatin lebih doeloe klas II. Sang Goëroe tida bisa toemplekin peladjaran teroe-meneroes dalem tempo sabentaran maski itoe moerid ada sampe tjoekoep kapandean boeat tangkep samoea jang hendak dikasih. Segala apa diberiken dengen berängsoeran menoeroet programma jang tentoe. Satoe moerid jang pinter dan radjin beladjar tjoemah bisa kasih liat kapandeannja dengen teroes-meneroes naek klas pada satiap taon, sedeng moerid jang males dan bodo sering mandek hingga djadi katinggalan oleh kawan-kawannja. Sabalikna peladjaran batin, jang bergantoeng atas *pikiran* dan *pengartian*, ada terdiri dari beberapa pokok-dasar jang masing-masing mengandoeng bibit pengartian loeas. Begitoe lekas itoe orang dapat kasdaran dan bisa tangkep itoe pokok-dasar, bagian-bagian laen jang mendjadi tjabang-tjabangnya ia bisa *mengarti sendiri* zonder banjak soesah lagi, tida perloe diadjarin satoe per satoe seperti peladjaran sekola. Keterangan jang diberiken dalem kitab-kitab agama, dalem chotbah-chotbah atawa lezing-lezing seperti jang diadaken dalem ini krenteng, tjoemah boeat bikin orang djadi lebih mengenal pada itoe pokok-pokok-dasar jang djadi poesatnja peladjaran. Satoe kalih si pembatja dan pendenger soedah *mengarti* dan *sedar*, segala soeal-soeal laen jang sering dialamken dalem penghidoepannja ia nanti bisa petjahin sendiri, sebab di sabelahnja peladjaran jang diterima dari loear, orang poen bisa dapat banjak pengartian penting dan berharga dari pengalamannja sendiri, baek jang dikete-moeken sekarang ini, baek poen jang berätsal dari penghidoepan-penghidoepan jang doeloe-doeloe. Maka itoe maskipoen kita haroes insjaf kalemahan dan ka-

LEZING LEZING DI KWAN IM TONG.

bodoannja diri sendiri — hingga traoesah harep bisa poenjaken itoe Peringetan Bener dalem toedjoeh hari seperti jang dimaloemken oleh Buddha — djanganlah lantes berketjil hati kapan meliat berat dan soekernja ini Djalanan Katoedjoeh, sebab boleh djadi antara kita-orang jang bisa berkoempel disini ada djoega jang dengen lekas dan mendadak bisa dapet itoe kasedaran, hingga sanggoep liwatin ini satoe Djalanan jang amat penting dalem tempo djaoe lebih pendek dari-pada jang kita sangka. Segala apa ada bergantoeng atas *kapandean* dan *kagiatan kita sendiri*.

Sekarang saja maoe terangken apa itoe jang dinamaken „Peringetan Bener.“ Ini nama sendiri ada sa-derhana sadja, dah saorang jang belon kenal peladja-ran Buddha nistjaja nanti kira tida ada apa-apa jang perloe diterangin dan diroendingin lagi, sebab itoe jang diseboet „bener“ — p kiran, pengartian, pertjo-baan, peringetan — tentoelah „tida salah,“ hanja *baek* dan *berfaedah*, dan ampir sasoeataoe orang bisa lantes mengarti, bahoea barang siapa hendak *berlakoe bener*, segala apanja poen koedoe *bener* djoega !

Aken tetapi seperti soedara-soedara tentoe soedah taoe, itoe seboetan ringkes dan saderhana dari Buddhisme ada mengandoeng artian loeas — begitoe loeas hingga tida gampang bisa dipikir dan dimengarti oleh sembarang orang, dan malah achli-achli pemikir jang terkenal pande poen bisa djadi terkedjoet dan bingoeng kapan mengoesoet Peringetan Bener poenja tingkat-tingkatan jang paling tinggi. Oepamanja, ada banjak orang jang artiken, dengen „Peringetan Bener“ Buddha ada maksoedken *peringetan atas sagala ka-dadian dalem penghidoe pan jang doeloe-doeloe*, boeat mana Buddha sendiri memang mempoenjai pengataoean tjoekoep sampoerna. Seperti dalem salah-satoe dongengan di kitab *Jataka* ada ditjeritaken halnja satoe orang jang telah bitjara djelek atas dirinja Bud-

dha. Koetika ini hal disampeken padanja, Buddha berkata pada moerid-moeridnya : „Dalem penghidoepan doeloe akoe perna hinaken itoe orang, maka sekarang ia bitjara djelek dari hal akoe ; dari itoe akoe tida ada hak aken merasa goesar padanja.“

Inilah, soedara-soedara, ada satoe dari Peringetan Bener poenja sifat-sifat paling tinggi jang tjoemah diampoenjai oleh satoe Arhat (O-lo-han) atawa Orang Soetji jang beräda di tingkatan ka'ampat, atawa jang lebih atas lagi. Ini matjem peringetan tentoe sadja masih terlaloe djaoe boeat diampoenjai oleh saorang biasa, dan apa jang Buddha adjar goena oemoem boekan ditoedjoeken ka itoe djoeroesan, hanja sakedar jang berhoeboeng dengen manoesia poenja penghidoepan sahari-hari jang sekarang saja maoe tjoba terangken.

Lebih doeloe saja maoe oendjoek, bahoea *Peringetan* ada laen dari *Pikiran* dan *Pengartian*. Itoe Pikiran ada seperti pekakas jang dipakerdjaken oleh manoesia boeat sampeken satoe maksoed, perboeatan atawa toedjoean, dan sifatnya tjoemah saliwatan, kerna lantes berenti atawa linjap begitoe lekas itoe soeal jang dipikirin soedah tida ada lagi. Itoe Pengartian, bagi orang jang kabanjakan, ada boeah atawa hatsil jang didapet dari Pikiran, maskipoen boeat saorang jang hendak mentjari kasampoerna'an batin, Pengartian Bener perloe diampoenjai lebih doeloe, atawa poen berbareng, dengen Pikiran Bener, jaitoe Pikiran jang haroes dipake oentoek sampeken maksoednya. Tetapi itoe Pengartian jang kita soedah dapat atawa ada poenja, maskipoen jang baek dan bener, ada banjak jang djadi berobah, jaitoe tambah lama semingkin samar, dan terkadang djadi linjap, moesna atawa terloepa sama sekali. Dalem doenia ada banjak apa-apa jang dateng dari loear atawa jang terjadi di sapoeter kita, jang menjebabken apa jang satoe kalih kita soedah.

LEZING-LEZING DI KWAN IM TONG.

dapet dan mengarti, komoedian terlepas dan ilang kembali. Oepamanja, ada banjak orang jang sekola Olanda atawa Tionghoa soedah loepa itoe bahasa dan hoeroef atawa spelling-nja (edjaännja) maski tadinja iaorang sampe *mengarti* segala jang dipeladjarin. Dan begitoe poen dengen sadjoemblah pengartian laen, jang dengen pake banjak pikiran kita orang berkoetet peladjarin atawa perhatiken koetika masih moeda, tetapi belakangan, lantaran djarang dipake, lantes terloepa dan kita tida inget lagi. Begitoelah ada banjak orang jang koetika kena alamken karoegian dan laen-laen hal tida enak lantaran alpa atawa keliroenja, lantes merasa sekarang marika soedah *mengarti* kabodoaan dirinja, hingga tida bisa kadjeblus poela. Tapi boekan djarang kadjadian, itoe pelajaran getir jang ia soedah dapet dan merasa „tjoekoep mengarti,“ tida bisa tjegah aken ia terdjeroemos poela boeat kadoea atawa katiga kalihnjia. Oepamanja, ada banjak pendjoedi jang waktee kalah besar soedah bersoempah pandjang-pendek boeat menjingkir dari kartoe atawa tida maoe maen besar lagi, tapi komoedian telah kesèrèt poela ka medan perdjoedian sampe djadi roedin, maskipoen iaorang soedah „mengarti“ kadjahatannja berdjoedi.

Kenapa begitoe?

Sebabnja tida laen, hanja kerna ia *tida inget* itoe pengalaman tida enak dari tempo doeloe, lantaran ketarik oleh kawan-kawan dan laen apa-apa di sapoeternja jang bikin peringetannja atas pengalaman jang doeloe itoe mendjadi samar atawa boeras.

Djadinya, itoe segala Pengartian, teritoeng djoega jang baek, bener dan berfaedah, tida meneloeng banjak kapan orang tida bisa pegang atawa simpen itoe dalam iapoenna Peringetan, jang boleh disamaken sabiagi „goedang“ dari iapoenna segala pengalaman. Dan itoe pengalaman jang orang dapet ada amat banjak

matjemuنجa ; bagoes dan djelek, baek dan djahat, enak dan tida enak, berfaedah dan sia sia, kotor dan bersih, dan sabaginja lagi.

Saorang jang tjerdik tida nanti lantes simpen dan djedjelin sadja itoe segala pengalaman, jang beroepa pengartian, pikiran atawa perasa'an, ka dalem peringet-anja dengen tida perdoeli bagimana sifatnja dan diantepin tertjampoer adoek. Ia nanti pilih dan saring lagi dengen terliti satoe per satoe — jang djelek, djahat, kotor dan sia-sia atawa tida-berfaedah, lantes dising-kirin, sedeng jang bagoes, baek, bersih dan bergenra laloe disimpen dan dirawat soepaja tinggal seger selamanja dan saban-saban bisa digoenaken boeat kabækan dan kaberoentoengannja sendiri.

Oepamanja, ada satoe orang bitjara kasar pada kita ; kapan satjara bodo kita selaloe simpen di hati atawa ingetin itoe perlakoean tida enak sampe berminggae-minggae, berboelanen atawa bertaonan, pastilah ini peringetan nanti *menjiksa* kita poenja pikiran, kerna itoe dendem hati jang mengoerêk feroes nanti membikin linjap atawa mengganggoe kita poenja kasenan-gan dan katentreman. Dan kafaedahan apakah jang kita aken dari ini matjem *peringetan*? Brang, kalih kaloe ada koetika kita nanti *membales* dengen goenaken djoega itoe matjem oetjapan kasar, atawa nanti merasa *girang* djikaloe mendenger itoe orang, jang telah bitjara kasar pada kita, telah ditjelah atawa diperlakoeken kasar oleh laen orang, atawa poenia dapet katjilakaän. Dengan begitoe kita pernahken diri kita *di fihak kadjahatan*, kerna sedeng tadinja kita tida soeka dan sanget mendongkol kaloe laen orang bitjara kasar pada kita, sekarang kita merasa *senang* kaloe itoe orang jang kita bentji diperlakoeken kasar, poela atawa kita sendiri, kaloe bisa, ingin lakoeken pembalesan padanja atawa harel-harep katjilaka'nnja. Inilah ada boeah dari Peringetan jang *Tida Bener*,

LEZING-LEZING DI KWAN IM TONG.

jang kelirœ dan djahat.

Sabaliknja, djikaloe kita bisa loepaken itoe perboeatan jang tida enak, tida soeka mendendem lebih djaoe, hanja memberi maaf atas itoe orang poenja kasalahan, pastilah itoe oeroesan ketjil tida djadi berboentoet pandjang, dan pikiran sendiri tida aken terganggoe lagi oleh itoe peringetan jang tida enak, sebab biasanya manoesia jang bertabeat ngoerék, soeka mendendem dan selaloe ingetin segala kadjadian jang menimboelken gêmês dan djèngkèl, djeloes dan dengki, mendjadi keras atawa kedjem hatinja, ketjoet dan moeroeng tabeat atawa parasnja, dan satoe koetika, kapan ia tida bisa lekas simpangin pikirannja boeat meloepaken, bisa ganggoe iapoenna zenuwen dan meroesak djoega pada kasehatannja.

Sabaliknja, sabagi pengganti boeat itoe peringetan jang tida enak dan tida baek, haroeslah kita-orang koempoelin dalem peringetan kita segala perboeatan baek, manis dan menjenangken jang kita perna terima dari laen-laen orang, sebab ini matjem peringetan boekan sadja nanti membangkitken kita poenja boedi dan perasaan berterima kasih atawa *oe-t jèng* pada itoe sobat-sobat jang berlakoe baek, tapi djoega menimboelken perasaän *senang*, *girang* dan *goembirah*, jang ka-soedahannja membikin kita poenja penghidoepan mendjadi lebih *tentrem* dan *beroentoeng*. Sekalipoen kita sendiri perna berboeat salah jang menimboelken kamenjeselan, kita tjoemah sakedar ingetin itoe boeat mendjaga djangan sampe kena oelangin lagi, tapi *boekan* boeat tindes kita poenja pikiran dengan *kandoeng* penjeselan saoemoer hidoe; sebab di hadepan kita masih ada terboeka banjak djalanan teboes atawa perbaekin itoe kasalahan dengan lakoeken apa jang baek dan bener. Djikaloe lantaran terlaloe menjesel atawa selaloe pikirin sadja satoe kasalahan, kita bikin kawarasian djadi terganggoe, pastilah se-

mingkin koerang itoe kasempetan aken berboeat kabackan, hingga itoe matjem peringatan boekan termasoek pada Peringatan Bener.

Bagimana banjak orang jang soedah tanggoeng sangsara hati atawa pikiran dari lantaran simpen dan pelihara segala matjem peringatan jang tida bener, itoelah saja rasa soedara-soedara samoea, banjak atawa sedikit, soedah perna saksiken djoega di mana-mana, antara sobat-sobat dan kenalan, atawa brangkalih merasain djoega sendiri. Ada banjak soeal-soeal jang kita hadepken salagi dalem oesia masih moeda, jang membikin kita djèngkèl, gémès, goesar, koeatir atawa sedih, kapan ditimbang dalem pengartian jang kita ada poenja sekarang, ternjata ada bodo, gêndêng dan sia-sia, hingga kita sendiri sering djadi tertawa bœat itoe segala matjem kagèloan. Malah *sekarang* poen terkadang kita kena hadepken apa-apa jang, koetiká baroe terdjadi, membikin pikiran kita tergontjang, bingoeng dan kesel, tetapi liwat beberapa hari atawa minggoe kita djadi insjaf jang itoe kakoeatiran dan kabinjoengan tida beralesan dan malah kita bisa hadepken itoe segala ganggoean dan karèwèlan dengen sabar dan tentrem. Dalem roemah tangga, atawa antara sobatsobat dan kawan kawan, pegawe-pegawe, atawa antara kita poenja boedjang-boedjang, sering timboel apa-apa jang bikin kita poenja amarah meledak, atawa kita kena oetjapken perkata'an keras dan pêdés jang belakangan, sasoe dah memikir lebih djaoe atawa gontjangan dari itoe perledakan mendjadi sirep, kita djadi menjesel, malah berkasiyan pada itoe orang jang kita soedah maki-maki atawa perlakoeken kasar. Kapan kadjadian begitoe, biasanya orang bilang, „akoe kaloepa'an“, jaitoe *loepa* pada kamoe stian boeat berlakoe sabar dan pake timbangan sehat terhadep sasoe atoe kada'an jang tida menjenangkan.

Djoega kita sering ketemoein orang-orang jang tjerita

LEZING-LEZING DI KWAN IM TONG.

tentang kasoekeran dan karoewetan dalem penghidoep-annja jang kita sendiri liat sabenernya tida terlaloe penting — malah banjak jang tida berharga sama sekalih — boeat dirèwèlin atawa didjengkèlin, kerna bisa lantes abis dan linjap begitoe lekas dilopeaken. Banjak soeal jang orang gemesin, bingoengin atawa sedihin, sabétoel-nja ada oeroesan tèktèkbengèk jang boleh dihadepin sambil tertawa ; tapi oleh itoe orang-orang jang tersangkoet dipandang begitoe besar dan penting hingga marika tida bisa makan dan tidoer enak, pikirannja koesoet, zenuwenna terganggoë, malah ada djoega jang roesak kasehatannja.

Ini semoea, soedara-soedara, pokonja ada dari lantaran itoe orang orang soedah berälpa boeat *simpen* dan *pelihara* dalem goedang peringetannja segala apa jang baek, bener dan menjenangken, hanja didjedjelin sama sifat-sifat boeroek, kotor dan tida baek, jang tambah lama semingkin pengarohin tabeat dan pikiran-nja, jang dibikin djadi moeroeng, boetek, tjioet dan tjoepet. Maka djikaloe itoe sifat-sifat tida baek dan tida menjenangken kita-orang bisa singkirin, dan tida kasih koetika aken marika bersarang dalem peringetan, pastilah, soedara-soedara, kita lantes beroleh *penghidoepon* jang *lebih menjenangken*, jang mendatengken djoega *katentreman* dan *kaberoentoengan*.

Begitoelah soedara-soedara bisa liat, bagimana Bud-dha poenja pelajaran, kapan didjalanken dalem praktijk, jaitoe dalem penghidoepan sahari-hari, dengan lantes dan *contant sekarang djoega* mengasih pada kita kabaékan, kasenangan dan kaselametan, lahir dan batin, hingga penganoet Buddhist jang toeroet dengan soenggoë hati itoe pelajaran, traoesah moesti toeng-goe gandjaran atawa kaberkahan di acherat seperti jang dikamoekaken oleh laen-laen agama, hanja di ini doenia, *sekarang djoega*, kita bisa dapet apa-apa jang meninganken kita dari tindesannja kahidoepan, jang

memberi katentreman dan kaberoentoengan.

Demikianlah ada kafaedahannja itoe Djalanen Oetama jang Katoedjoeh, jang dinamaken *Peringatan Bener*. Dan apa jang saja bitjaraken sekarang, tjoemah baroe mengenakan bagian sabelah bawah jang saderhana oentoek orang-orang biasa. Laen boelan saja nanti bitjaraken bagian sabelah dalem jang lebih tinggi dan lebih menarik. Sampe disini saja hatoerken: selamet malem !

XLVI.

(*Lezing dari Batavia Buddhist Association di Klen-teng Kwan Im Tong, pada tanggal 5 October djam 8,15 sore*).

Soedara-soedara,

Laen kafaedahan lagi jang bisa didapet dari menjalankan Peringatan Bener adalah menjangkok dan menjimpoin dalem kita poenja ingetan apa jang menjadi kita poenja kaharoesan atawa kawadjiban. Ini kamoestian saja rasa samoea orang soedah taoe dan mengarti, boekan ?

Satoe anak sekola haroes *inget* apa jang diadjar oleh goeroenza; satoe boedjang atawa pegawe haroes *inget* apa jang diperentah atawa dipesen oleh madjikan atawa chefnja; satoe kepala pakerdja'an moesti *inget betoel* segala apa jang ia wajib atoer, oeroes dan tilik; satoe toean atawa njonja roemah haroes *inget* apa jang perlœ boeat mengatoer beres roemah tangganja dan laen-laen kamoestian jang perlœ dikerdjaen sahari-hari. Ini samoea peringatan jang berhoeboeng dengan sasoeatoe orang poenja kawadjiban soedah sampe tjoekoep dimengarti, hingga kaliatan tida perlœ boeat dioendjoek dan dibilitaraken lagi.

Tetapi pada kabanjakan orang itoe kaharoesan boeat *ingetin* apa jang djadi marika poenja kawadjiban kaliataji bersifat automatisch atawa menjadi satoe ka-

LEZING-LEZING DI KWAN IM TONG.

biasa'an sadja, zonder di-ichtiar atawa dloesahaken lagi. Jang di-inget betoel-betoel sampe tertjangkok dan tida bisa terloega tjoemah boeat oeroesan jang penting atawa menarik hati, tida perdoeli baek atawa djahat, mengentoengken atawa meroegiken, berfaedah atawa sia-sia. Ada banjak orang moeda jang inget dan kenalin betoel roepa dan hikajatnya sasoeatoe bintang film ; bisa inget banjak lagoe dan njanjian ; ada lagi achli-achli agama jang inget oedjar dari kitab-kitab soetji zonder liat lagi boekoenja; orang dagang jang inget harga dari sakean banjak barang jang didjocal dalem tokonja ; orang sastrawan jang inget sjairan atawa kadjadian penting dalem hikajat jang ia perna batja, dan toekang kong-kouw bisa inget dan toetoerken banjak lelakon jang kadjadian di tempo doeloe dengan djelas satoe per satoe.

Tetapi soedah mendjadi oemoem, itoe orang dagang jang inget harga dari riboean matjem barang jang di-dasarken dalem tokonja, seringkalih loepa atawa alpa dajem laen-laen hal, oepamanja tida bisa inget isfija boekoe peladjaran jang ia baroe batja bebrapa hari berselang. Banjak pegawe dan anak-anak moeda jang dapet tjomelan lantaran soedah loepa djalanken perentah atawa pesenan boeat iaorang kerdjaken. Ada banjak arang jang repot sama pakerdja'an mempoenjai tabeat begitoe peloepaan hingga djikaloe tida bikin tjatetan seringkalih tida bisa inget boeat penoehken apa jang soedah didjandji atawa jang haroes dikerdjaken. Malah antara golongan terpeladjar tinggi jang biasa bekerdja dengan pake pikiran, ada banjak jang peloepaanja begitoe heibat, hingga perkata'an „Professor lingloeng“ soedah menjadi oemoem dan di-goenaaken sebagai pojokan pada kaoem terpeladjar jang loepa segala apa kapan lagi memikirin soeal-soeal jang soelit.

Sasoedah taoe pada ini ka'ada'an — pada ini boekti

bahoea ingetan manoesia tida selamanja bisa tangkep segala apa jang haroes diperhatiken atawa dikerdjaken sahari-hari — maka ada mendjadi kawadjiban dari sasoeatoe orang boeat memilih dan mengatoer soepaja otaknja tida didjedjel terlaloe banjak sama segala apa jang tida beroena, apalagi jang koerang baek, meroegiken atawa mendjengkelin dengen tida perloe-nya. Sabagian besar dari karoewetan jang menjerang pada ingetan manoesia, jang membikin ia djadi binggoeng, tergontjang dan tida bisa atoer beres penghidoepannja, teroetama dari lantaran mempoenjai kabiasaan aken kasih pikirannja ketarik ka berbagi-bagi djoeroesan; hatinja merasa djengkel, kesel dan goessar, atawa poen beroembirah, girang boengah, boeat segala oeroesan jang sabetoelnja boleh traokesah di-perdoeliken. Djikaloe, dengen perhatiken itoe **soeal-soeal** sampingan, kawadjiban dan kaperloean jang ada di depan mata selaloe dioeroes beres, masih mending djoega; tapi ada banjak orang jang sengit dan seperti kalap, atawa bergirang sampe loepa daratan, kapan mendenger kabar djelek atawa kabar baek jang tida bersangkoetan pada dirinja, tapi pengaroezin pi-kirannja begitoe roepa hingga bikin terlantar atawa loepaken pakerdja'an dan kaharoesannja sendiri,

Begitaelah ada banjak orang jang, koetika abis boelan terima gadji, soedah reken betoel itoe kahatsilan tjoemah tiba tjoekoep boeat kaperloean roemah tangga sahari-hari dengen tida ada sedikit poen kalebihannja. Dengan mendadak ada moentjoel di hadepannja apa-apa jang tida begitoe perloe tapi menarik hati, hingga sabagian dari itoe oewang dipake laen djoeroesan, dan kasoedahannja membikin ia djadi tekort teroes-meneroes. Ada banjak pamoeda jang merasa perloe betoelin fietsnja jang soedah bedjet, atawa beli satoe kemedja sebab jang ia ada poenja **samoea** soedah boetoet dan roebat-rabit, atawa ganti

LEZING-LEZING DI KWAN IM TONG.

spatoenja jang soedah bolong, tapi toenda niatannya itoe dari satoe ka laen boelan, kerna itoe oewang telah dipake *menonton* bersama kawan-kawan jang boedjoekannya ia tida bisa tolak.

Ada banjak orang jang dateng masoek di toko boeat beli satoe doeä barang jang ia perloe, kapan kaloeär laloe membawa boengkoesan besar, kerna kena beli apa-apa jang tadinja sama sekalih ia tida niat dan djoega sabetoelnja belon terlaloe perloe, tjoemah lantaran hatinja merasa ketarik.

Ada banjak boekoe dan peladjaran jang moesti difahamken, atawa soerat jang haroes dibales, atawa rekening jang koedoe lekas dibajar, telah ditoenda dari satoe ka laen hari lantaran perhatian ditoedjoeken ka laen djoeroesan.

Dari *saratoes* orang jang masoek ka Pasar Gambir dan laen-laen tempat tontonan dan karamean, kapan diselidiki kaädaän oewangnja dan kaperloean roemah tangga atawa dirinja dengen terlitii, nanti kataoean brangkalih belon ada *doea* jang betoel-betoel ada kallebih oewang — jaitoe tida kandoeng kainginan atawa mempoenjai kaperloean jang lebih penting dari pada menonton. Maka soedah sampe terkenal, *saban* ada Pasar Gambir atawa Pasar Malem, banjak rekening dari toko-toko jang tida dibajar atawa ditoeng-gak oleh langganannja !

Ini samoea kagandjilan pokonja ada dari lantaran kabanjakan orang poenja *peringetan* tida dikempoel atawa ditoedjoeken pada apa jang paling penting, berfaedah dan mengentoengken, hanja dibiarin mawoer sasoekanja, sadadinja atawa sakenanja sadja, hingga jang perloe dan berfaedah kena terädoek mendjadi satoe sama jang sia-sia dan malah meroegiken. Satoe barang jang orang selaloe *ingetin* dengen soenggoe hati, tida nanti gampang terloepa, kerna ia lantes *madjoe ka depan* begitoe lekas ada kasemptan,

Ada banjak orang jang biasa bilang, „Soedah lama akoe niat pergi melantjong ka itoe tempat, atawa membatja itoe boekoe, tapi belon ada tempo.“ Samentara itoe, brangkalih soedah beberapa poeloeh kalih ia pergi menonton atawa lakoeken laen-laen pakerdja'an jang mengilangken banjak tempo dengen sia-sia, kerna ingetannja *lebih ketarik* ka laen djoeresan.

Lantaran begitoe ada watek dan tabeat dari kabanjakan orang, maka tiada heran djikaloe sabagian besar dari angen-angen baek dan moelia, biar poen jang saderhana dan gampang didjalanken, seringkalih tida berwoedjoet. Itoe niat-niatan baek tjoemah inoentjoel saliwatan, tida dipegang keras dan tetep, tida ditjangkok dalem peringetan, hingga gampang sekalih ter dorong ka belakang oleh laen apa-apa jang lebih menarik maskipoen koerang berfaedah. Orang biasa bilang, sasoeatoe kagagalau boeat berlakoe bener, mendjalanken kawadjiban atawa berboeat kabaekan, ada dari lantaran „koerang koeat hati“ atawa poen „lemah“.

Dari manakah datangnja itoe *kalemahan* ?

Tiada laen, hanja lantaran itoe orang soedah berälpa aken pegang keras dalem peringetannja itoe maksoed, toedjoean atawa pakerdja'an jang baek dan berfaedah.

Memang betoel ada banjak orang jang penghidoep-annja ada begitoe repot, banjak soeal jang siap hari haroes diperhatiken, banjak karoewetan jang haroes dipikirin tida berentinja, hingga betoel-betoel ia tida poenja kasempetan atawa tempo jang tjoekoep aken perhatiken apa-apa biarpoen jang baek dan berfaedah. Aken tetapi maski begitoe itoe ka'ada'an bisa djoega dirobah kapan ia soeka lakoeken meditatie siap malam lamanja saperampat djam sadja, pada waktoe mana ia tjoba singkiring sabentaran itoe segala pikiran jang

LEZING-LEZING DI KWAN IM TONG.

memenoehken ingetannja dan, aken gantinja, tjoba masoekin apa-apa jang ia *taoe* ada beroena bagi kamadjoean lahir dan batin. Banjak orang jang bikin dirinja „ripoeh”, lantaran biasa tangkep sadja apa jang dateng, zonder dipilih dan disaring, boeat bisa tolak apa jang tida beafaedah disimpen dalem peringetannja. Maka kapan dalem meditatie orang tjoba *pereksa* dengan terliti itoe segala sebab-sebab jang menimboelken karipoehan dan karoewetan pikiran, ia nanti dapetken *banjak sekalih* apa-apa jang boleh dilempar ka camping. Kapan soedah bisa berboeat begitoe, maski bagimana ripoeh iapoenna pakerdja'an, ada banjak djoega apa-apa jang boleh dikasih masoek dan disimpan dalem peringetan, dan jang bisa datengken kafaedahan bagi dirinja.

Oepama, satoe orang soedah perna alamken kagetiran hebat lantaran toeroetin nafsoe dalem perdjoedian. Maski di dalem hati ia soedah tida ingin berdjoedi lagi, tapi saban kalih dateng di tempat pesta ia tida bisa tolak boedjoekan dari kawan-kawannja. Ia insjaf pada kalemahan hatinja jang gampang „kebawa angin.” Orang begitoe, sabelonnja pergi ka itoe pesta dimana ada diberi kasempetan boeat berdjoedi, haroes tjoba melakoeken meditatie, dalem mana ia *ingetin* dengan *soenggoe soenggoe* itoe segala kasoekeran dan kadjengkelan di tempo doeloe jang ia perna alamken koetika kalah berdjoedi. Kapan ini peringetan soedah tertjangkok keras dan terbajang djelas dalem pikirannya, ada harepan ia nanti mempoenjai kategoehan hati boeat *menolak*, kerna itoe ingetan — itoe Peringetan Bener jang dipoedijken oleh Buddha — membikin hatinya tida tergloer, tida bisa ketarik lagi, oleh perdjoedian.

Dengan perantara'an meditatie, jang dilakoeken dengan giat dan soenggoe hati, orang bisa perbaeki segala tjetjat dan kalemahan dalem batinnja boeat melawan segala ganggoean dan pengoda'an, boekan

sadja dari pendjoedian, hanja djoega dari minoeman keras, prampoean hina dan banjak laen-laen lagi. Saban kalah orang terdjeroemoes ka dalem kakelirœan, biasanja dikataken „koerang ingetan”. Ini seboetan memang betoel, jaitoe lantaran djarang sekalih ada orang jang perna tjoba koempoelin soenggoe-soenggoe pikiran dan ingetannja aken petjhahin sendiri soeal-soeal soeker jang lagi dihadepin. Boekan sedikit orang jang pikirannja djengkel dan roewet, sabaliknya dari *memikir* dengen soenggoe-soenggoe hati aken *pereksa* sebab-sebabnya, malah soedah tjoba *loepaken* itoe dengen simpangin pikirannja ka laen djeroesan. Ada lagi jang tjari karanganan dengen berdowa pada Toehan atawa Kwan Im atawa laen-laen machloek soetji aken minta pertoeloengan, atawa minta salah-satœ orang soetji jang dipandang „sakti” boeat kasih bantoean beroepa djampe, kijas, djimat atawa apa sadja. Sabagian lagi pergi lari minta advies atawa nasehat dari sobatnya atawa orang jang dirasa mempoenjai lebih banjak pengartian. Itoe kabiasaan boeat mentjari pertoeloengan dari loear soedah menjadi begitoe oemoem antara kabanjakan orang hingga djarang sekalih jang mengarti bahoea ada banjak soeal-soeal jang roewet dalem kahidœpan manoesia jang bisa dibikin ringan atawa poen disingkirken kapan orang soeka perlœuin melakoeken meditatie boeat *pereksa* dan *bermasjawarat* dengen *dirinya sendiri*.

Itoe pertoeloengan-pertoeloengan dari loear boekan sama sekalih tida ada faedah; tapi sifatnya tjoemah saliwin, boeat samentara waktoe sadja. Laen temponanti moentjoel poela laen soeal jang lebih atawa sama roewetnya seperti jang doeloean sabagitoe lama orang masih belon insjaf pada tjetjat dan kabodoan dirinja. Tjoemah kapan ia soedah bisa memikir, mengarti dan sedar atas segala kakoerangannja, dan ia lantes perbaeki dan singkirken apa jang salah, disitos

LEZING-LEZING DI KWAN IM TONG.

baroelah ia dapatken *karinganan* jang lebih tetep dan kekel.

Bhikkhu Silacara ada bilang :

Bagi kabanjakan orang jang bisa memikir loeas, barang jang paling tida memoeasken dan mendjeng-kelken dalem kahidoepan — itoe jang dibilang *Dukkha* jang sasoenggoenja dari ini doenia — adalah perasa'an dari iapoena tida sanggoep aken singkirin apa jang iapoena mata meliat menoeroet pemandangan dari iapoena tabeat sendiri, dengen terbebas dari itoe warna-warna jang ditimboelken oleh glas dari wateknja sendiri, hingga ia tida bisa liat segala apa menoeroet sifatnja jang bener. Hikajat dari sasoeatoe orang, begitoe lekas ia lintasi tingkatan hidoepr dari binatang, adalah berisi pertjoba'an boeat menarik, tambah lama semingkin deket, pada pemandangan jang *bener* dan *langsoeng* atas ka'ada'an jang sasoenggoenja, sabalik-nja dari pada perhatiken sadja apa jang tertampak di sabelah loear. Peladjaran dari philosophie, dari agama dan pengartian wetenschap, biar bagimana djoega maksoed dan toedjoeannja, sabagitoe djaoe dilakoeken dengen djoedjoer dan soenggoe hati, tjoemah meroepaken pertjobaan-pertjobaan dari sabagian manoesia boeat mengenalin apa jang bener.

Dalem agama jang satoe ini toedjoean ada lebih djelas dan didjalanken dengen pertjoba'an jang lebih glat, lebih tentoe maksoednja, dari pada laen-laen agama dan philosophie. Itoelah ada philosophie agama jang diadjar oleh Buddha — satoe peladjaran jang, kapan diringesken sampe pada oedjoengnja jang paling achir, meloeloe ada pemandangan atas segala apa menoeroet ka'ada'an jang sabenernja. Segala nasehat, poedjian dan andjoeran jang Buddha saban-saban oetjapkèn, maksoed dan toedjoeannja tjoemah *satoe* sadja, jaitoe menoeloeng pada sasama manoesia dengan salekas-lekasnja boeat dapetken itoe pemandangan

bener. Dibilang „dengan salekas-lekasnya,“ sebab tjara dari hidoepnja manoesia jang berdjalan teroes-meneroes, pada aohirnya, dengan didapetnya pengalaman jang menjedihken, nanti memaksa pada sasoeatoe orang aken meliat itoe bajangan dari sifat jang bener boeat segala apa. Itoe peladjaran dari Buddha hanja beroepa-peladjaran jang berlakoe di seloeroeh ini djagad, di sapoeter kita, tapi dibikinlebih ringkes dan lebih gampang dikenalin. Sasoeatoe Buddha, dalem toedjoeannja boeat menjiarken itoe peladjaran tentang Tjaranja mengenalin Pemandangan jang Bener, boekan dateng dengan mendadak, hanja ada djadi satoe bagian jang sawadjarnja dari atoeran wet alam, diinana kapan ada terdapet apa-apa jang tida di-ingin, boeat mana moesti ada djoega djalanan boeat menjingkir dari sitoe, haroes terdapet djoega djoeroe penoendjoek aken kasih kenal itoe djalanan boeat lolosken diri.

Samoea agama-agama ada oendjoek tida baeknja orang berlakoe serakah pada segala barang doenia, mengandoeng tabeat sompong, bangga, angkoeh, ke-maroeck, soeka membentji dan laen-laen pikiran dan perboeatan jang keliroe dan meroegiken pada diri sendiri. Siapa jang lakoeken teroes itoe kasalahan lataran dari bodo dan lemahnya, ia aken alamken bagi bagi kasoekeran jang achirnya nanti bikin ia sedar atas ka'ada'an jang sabernerna dari kahidoepan.

Begitoelah oleh natuur manoesia digangkèt, diadjar dan dihalangin toedjoeannja jang keliroe itoe — jang menjebabken ia merasa sangsara, getir dan poetoes harepan — sampe itoe samoea pengalaman tertitipak dalem peringetannja, jang nanti membawa perobahan atas lapoenja tjara hidoep hingga djadi lebih deket dan lebih tjetjok denger pri kabeneran.

Kita-orang tida bisa — zonder dapat pengalaman — lantes mengarti apa jang baek dan berfaedah, dan apa jang boeroek dan sia-sia. Tapi itoe segala matiem pe-

LEZING-LEZING DI KWAN IM TONG.

ngalaman tida menoeloeng banjak djikaloe kita tida simpen dalem peringetan. Orang jang dikataken „ban-del” atawa „tida merasa kapok” ada dari lantaran ia tida perna ingetin itoe segala pengalaman jang pait dan getir, kerna ia tida bisa didik atawa biasain dirinja boeat pegang dan simpen dalem peringetannja apa jang bener dan djaoein segala jang koerang baek dan sia-sia.

Segala pelajaran, pengalaman, pengliatan dan pendengeran baek dan berfaedah jang orang dapet, tida banjak artinya djikaloe tida masoek ka dalem ingetan. Ini kahidoepan mendjadi sia-sia dan ilangin tempo pertjoemah, djikaloe kita-orang tida dapet petik apa-apa jang memberi kafaedahan lahir dan batin. Maka mempoenjai Peringetan Bener ada lebih berharga dari pada mengempoel kakaja'an doenia jang selaloe berobah dan gampang moesna. Satoe kalih orang soedah *inget betoel* iapoenna tjatjat dan kakeliroean, ia tida gampang bisa menjasar atawa melakoeken kasalahan heibat.

Begitoelah, soedara-soedara, kita bisa liat bagimana penting ini bagian katoedjøeh dari itoe Delapan Djalan Oetama dari Buddha. Dalém lezing jang berikoet saja nanti bitjaraken lagi itoe djalan poenja tingkattingkatan jang lebih tinggi.

Selamet malem.

Pepatah:

Gagak djadi item boekan lantaran boeloenja di-paelasin tinta.

* *

Gangsa boeloenja poetih boekan lantaran sering seloeloep di aer.

* *

Orang jang tida bekerdja apa-apa satiap hari, tida bisa rasain kasedepannja mengaso.

Khong Tjoe sabagi Manoesia dan sabagi Goeroe.

MENOEROET PEMANDANGANNJA SAORANG JAPAN.

*Ditaelis oleh Professor Inoue Tatsujiro Dari
Imperial University di Tokyo.*

DISAL'N OLEH K. T. H.

APA JANG PROFESSOR I TATSUJIRO BILANG.

(*Samboengan nomor jang laloe*).

Khong Tjoe beroelang-oelaang memoejdiken pri dermawan, tapi ia poen meniarken kaharoesan boeat membakti pada iboe-bapa. Ini doea kabedjikan, jang ia sanget oetamaken, ada beräkar dalem manoesia poenja perasa'an hati. Boekan sadja Khong Tjoe ada saorang jang aloes perasa'an-hatinja, tapi djoega ia ada saorang jang sanget mendjoengdjoeng pri kapantesan dan kaberesan. Ia dapet kaseñangan dalem kasoesastran dan kasenian. Ia amat soeka mengadjar orang-orang laen boeat mengenal ilmoe jang aloes. Dalem katjinta'nnja pada kasenian, boleh dibilang Khong Tjoe ada berdiri ampir sendirian sadja di antara goeroe-goeroe-besar dari ini doenia. Ada menjadi kasaksian oemoem dalem hikajat, bahoea saban kalih kita dapetken orang-orang jang bisa lakoeken banjak perboeatan pande dan moëlia, boekan sadja tabeatnja tida mengasih liat apa-apa jang berhoeboeng dengan kaharoean hati, tapi djoega dengan satjara aneh marika ada sanget bertjatjat dalem perasa'nnja boeat oendjoek sympathie pada kasoesastran dan kasenian (literatuur dan kunst). Terlebih lagi, golongan Nabi-nabi atawa poen kaoem philosoof (achli-achli pemikir) begitoe sering dipoedji, diagogenin dan disoetjiken dengan adanja ini sikep jang tida poenja sympathie terhadep segala apa jang bersifat seni dan sastra. Khong Tjoe ada djadi satoe perbedaan jang sanget menjolok pada itoe kabiasaan jang boleh dibilang oemoem. Di dalem *Loen Gie* kita ada dapetken ini oedjar: „Hendaklah

KHONG TJOE SABAGI MANOESIA.

orang toedjoeken pikirannja boeat peladjarin itoe Too atawa Tjara Berlakoe; hendaklah ia mengandel pada kabedjikan, pada kadermawanan; hendaklah ia bergoembirah di dalem kasenian."

Khong Tjoe berpendapetan bahoea satoe orang tida haroes goenaken sa'antero kagiataanja meloeloe boeat oesahaken kabedjikan dari pribodi dan kalakoean; sikep begitoe aken bikin ia djadi dojong ka sabelah fihak sadja. Boeat mendjadi satoe manoesia, ada perloe orang dapat koetika boeat perliatken laen-laen kagiatan jang ada di dalem iapoenna watek; itoe orang ada sama seperti soedah mati kapan dalem kahidoep-annja soedah tida ada lagi perasa'an dari kaharoean hati dan pengharga'an pada segala sifat indah dari kasenian. Maka sasoenggoenja ada sanget menjenangkan boeat bisa ketemoein saorang jang mempoenjai kapandean memikir begitoe tinggi, dan teritoeng satoe dari goeroe-goeroe paling besar dalem hal berlakoe baek dan moerah hati jang doenia soedah perna saksiken, telah mengasih liat sikep manis dan indah seperti ada dioendjoek dalem seroehannja jang moelia pada manoesia boeat berlakoe goembirah pada kasenian. Dengan itoe perkata'an „kasenian“ soedah ternjata bahoea Khong Tjoe tida tjoemah watesken toedjoeannja pada ilmoe kapandean jang aloes atawa poen ilmoe soerat jang tinggi. Soedah terboekti dalem itoe perkata'an ia ada masoekken djoega itoe anem tjabang dari ilmoe seni jang ada terkenal di iapoenna zaman. Di dalem *Liu King* (Anem kitab Klassiek) sasoenggoenja tida meloeloe diadjar prilakoe baek dan kaboedian. Disitoe ada terdapat djoega ilmoe hikajat dan kasoesastran.

Dalem itoe zaman, di negri Lu (Louw-kok) ada hidoeper satoe achli-muziek bernama Ta Shih. Khong Tjoe pergi ketemoein padanja. Di dalem *Loen Gie* ada kadapetan beberapa potong dari pertjakepannya

Khong Tjoe dengen itoe achli-muziek, jang kita-orang bisa pereksa. Penoe-toean dari sабagian omongannja Khong Tjoe dengen itoe achli-muziek jang terbesar mengasih liat pengartian tinggi atas pendapetannja dalam soeal lagoe-lagoean. Dengan begitoe orang bisa dapet taoe dan merasa, jang Khong Tjoe ada satoe achli-muziek jang berpengartian loear biasa, dan sabagitoe djaoe mengenaken iapoena pengataoean boeat memeriksa dan menjelidiki sadalem-dalemnya atas itoe ilmoe, orang poen bisa merasa kagoem boeat toe tjara jang saderhana ia telah lahirken pikiran dan pendapetannja, biarpoen sabenernja ia ada termasoek satoe dari achli-achli beroending jang terbesar dalem itoe matjem kunst. Di salah-saloe bagian dari itoe kitab kita ada batja, bahoea koetika Khong Tjoe berada di negri Chi (Tjee-kok) ia dapet denger orang boenjiken lagoe muziek jang berätsal dari Keizer Shun, dan ia tjerita bahoea boeat tiga boelan sasoedahnja itoe ia djadi loepa pada kasedepannja iapoena barang santapan. Inilah maoe dibilang, itoe muziek dari Keizer Shun telah pengaroehln iapoena soemanget dan pikiran begitoe keras hingga ia tida taro perhatian pada laen apa-apa lagi di dalem itoe tempo jang berdjalan sampe tiga boelan lamanja. Ia tinggal teroes pikirin itoe lagoe jang ia soedah dapet denger, dan ampir tida perdoeliken pada santapan jang ia dahar. Boeat tiga boelan lamanja ia koempoelken kagiataannja sambil meloepain segala apa boeat fahamken itoe muziek dari Keizer Shun dengen uafsoe kagoembirahan begitoe besar, hingga membikin dari bibirnya sendiri telah haloear soeara jang menjataken heran dan kagoem, dengan membilang jang ia tadinja tida sangka bagimana besar kagirangan jang muziek bisa kasih pada dirinja, dan djoega tida mendoesin bagimana keras itoe kunst soedah memegang dan mengiket hingga ia djadi sabagi orang tawanan lantaran

KHONG TJOE SABAGI MANOESIA

kasemsem di dalem kasedepannja.

Djoega kita ada batja dalem boekoe dari Chun Nan Tze, bahoea koetika itoe goeroe muziek bernama Ying Chi Chi kasih denger tetaboeannja satoe kalih, Khong Tjoe merasa beroentoeng dan bergirang boeat tiga hari lamanja. Inilah maoe membilang, sasoedah itoe goeroe muziek kasih oendjoek kapandeannja, itoe kasenangan jang dialamken oleh Khong Tjoe ada begitoe dalem, hingga ia dapatken perasaän beroentoeng atawa bergirang boeat tiga hari, lantaran ingetannja terdjudjel oleh itoe lagoe indah jang ia denger.

Kombali kita ada batja di dalem *Loen Gie*: „Manoesia moelai dengen sjairan, lantes dengan perädatan (ceremonie), dan laloe djadi sampoerna di dalem muziek.” Menimbang dari ini oetjapan, kaliatannja seperti djoega Khong Tjoe memandang pada kapandean dalem ilmoe muziek sabagi daja boeat poenjaken kaboodajan (cultuur) jang sampoerna. Dan Khong Tjoe boekan tjoemah soeka sama muziek, senang dengerin lagoe-lagoe indah dan aloses jang dimaenken oleh laen-laen orang, tapi djoega ia sendiri ada poenja bakat atawa aanleg boeat maen muziek seperti jang djarang terlampaik pada sembarang orang. Ia biasa maenken tetaboean pake tali jang dinamain *chin* (*kim* atawa ketjapi), dan pande sekalih memaloe tetaboean jang dinamain *ching*, samatjem pekakas dari batoe jang berboenji sabagi klenengan, oentoek mana ada meminta tempo jang lama boeat beladjar dan membiasain. Djoega ada ditotoerken hal Khong Tjoe maenin satoe tetaboean dinamain *se*, samatjem guitar, dan laloe menjanji. Hal Khong Tjoe boenijken itoe tetaboean sambil menjanji ada mengoendjoek bahoea ia boekan sadja achli dalem itoe pekakas, tapi djoega ada poenja kapandean boeat njanijken lagoe-lagoe dengan soeara jang merdoe. Djoega di laen bagian ada ditjatet bagimana ia soedah maenken itoe pekakas

chin dengen dianter sama njanjian.

Ini nafsoe dari Khong Tjoe kepada ilmoe muziek, dan kapandeannja sama lelagoean dan njanjian serta pekakas-pekakasnja, ada djadi sabagi kaen pemboengkoes dari itoe batoe karang jang keras, tadjem dan menoesoek, dari ilmoe peladjaran aken memegang tegoeh moraal dan kabedjikan, jang ditatah oleh manoesia poenja atoeran; djøega terhadep itoe perasa'an jang kakoe tentang bener dan salah, dan pada hoekeeman jang bakal moentjoel kapan orang berani melanggar. Ini samoea dibikin djadi koerang kakerasannja, dan terganti oleh sifat lémés dari ilmoe muziek, njanjian dan sjairan jang berdasar atas kasenian, jang tida dikenal oleh golongan jang tjoemah kaloearkan atoeran-atoeran di dalem kitab-kitab, dan pada itoe nabi-nabi jang tabeat atawa atoerannja ada serba kakoe dan keras.

(Apa jang Khong Tjoe bilang pada itoe Goeroe Muziek jang termashoer dari negri Lu ada begini:— „Orang bisa taoe bagimana moesti maenken muziek Pada permoela'an dari itoe lagoe, samoea bagian-bagian nya haroes mempoenjai soeara berbareng. Salagi berboenji lebih djaoe marika haroes menjotjoki satoe pada laen, beberapa di antaranja dengen lagoe jang kentara dan mengalir zonder terpoetoes, dan tjara begitoe berdjalanan teroes sampe pada achirnya.” Dari ini oetjapan djadi ternjata, pengartiannja Khong Tjoe tentang ilmoe muziek tida lebih rendah dari-pada pengartianja djoeroe-djoeroe muziek jang termashoer di negri Barat sekarang ini, jang djøega menjataken dengen pasti sekalih bahoea, antara laen-laen, samoea bagian dari itoe soeara haroes dimoelai dengen berbareng, dan haroes tjoetjok di dalem sapandjang itoe antero lagoe. — T.Z. Tyau).

(*Ada berikoeijnja*).

Pemilihan Dalai Lama dan laen-laen Pendita Besar di Thibet.

(MENOEROET KATERANGAN DARI TOELISANNJA PROFESSOR T. W. RHYS DAVIDS, MADAME BLAVATSKY, MADAME DAVID NEEL, MADAME ALICE LEIGHTON CLEATHER, DAN LAEN-LAEN).

I.

Dalai Lama dan Pantshen Lama.

Koetika Tsongkapa jang terkenal sabagi „Luther dari Thibet,” adaken perobahan atas Agama Buddha dalem itoe negri jang soedah ketjampoeran sama penjembahan pada segala dewa dan djin jang tida termasoek dalem atoeran Buddhist, ia soedah bisa dapet banjak pengikoet, kerna apa jang itoe djoeroe-pengrobah adjar, ada agama jang bersih seperti jang disiarkan oleh Buddha Gautama, pendiri dari Buddhisme. Pengikoet-pengikoet dari Tsongkapa bisa dikenalin dari iapoenja djoebah dan koedoengan kepala serba koeuning oranje, menoeroet warna jang biasa digoenaaken oleh samoea bhikkhu-bhikkhu di India sadari koetika Buddha masih hidoeper teroes sampe sekarang. Tadinja kaoem pertapa'an dan pendita-pendita Buddhist di Thibet biasa memake koedoengan kepala dan djoebah warna merah.

Maski Tsongkapa tida perna ambil bagian dalem pamerentahan gredja di Thibet, jang beräda dalem tangannja Lama-lama dari kaoem Sakya, jang berkoeasa atas agama dan politiek, tapi kamadjoeannja itoe kaoem „karpoes koening” jang mendjalar begitoe loeas dan tjeplet menjebabken pengaroehnja golongan „karpoes merah” — pengikoet dari kaoem jang soedah ada doe-loean — menjadi goerem dan terdorong ka belakang, hingga di pertengahan abad ka-15 Keizer Tiongkok,

jang memegang hak dipertoean atas Thibet, telah akkoein pada doea pemimpin dari itoe kaoem jang baroe, sabagi kepala pamerentah dari negri Thibet jang haroes membajar oepeti pada Tiengkok. Itoe doea pemimpin pada itoe masa ada terkenal sabagi *Dalai Lama* dan *Pantshen Lama*, dan masing-masing ada djadi Pendita Kepala dari klooster klooster besar Gedun Dubpa, di deket Lhasa, dan Tashi Lunpo, di sabelah dalem dari Thibet. Sadari itoe koetika ini Doeae Pendita Kepala teroes meneroes memegang kakoeasa'an atas Thibet : Dalai Lama lebih banjak perhatiken soeal pamerentahan negri dan politiek, hingga ka-doedoekannya ada sabagi Radja dari Thibet, samentara Pantshen Lama lebih banjak perhatiken pimpinan rohani atawa ka'agama'an. Maka sedeng di Thibet sendiri Dalai Lama ada lebih berkoeasa, adalah dalem kalangan agama Pantshen Lama ada lebih dihormat boekan sadja oleh pendoedoek Thibet tapi djoega oleh kaoem Buddhist di Tiengkok, Monggolia dan Asia Tengah.

Tentang pemilihan pengganti dari itoe doea Lama Besar jang djadi kepala dari Thibet, Professor Rhys Davids ada bilang begini :

Haroeslah diperhatiken bahoea ada mendjadi satoe kabiasa'an jang koeno dari kaoem Buddhist Oetara (Mahayana) aken memandang pada anggota-anggota jang termashoer dari kaoem persoedara'an pendita-pendita sabagi pendjelma'an dari Avalokitesvara (Kwan Shi Im), dari Manjusri (Wen-Shu), atawa dari Amitabha (O Mi To Hoed). Ini machloek-machloek soetji disangka ada mempoenja kakoeasa'an aken, salagi marika tinggal teroes di atas Langit, moentjoel ka doenia dalam satoe *Nirmanakaya* atawa toeboeh bikinan jang beroepa manoesia. Dengan tjara begitoe maka Pantshen Lama dipandang sabagi pendjelma'an, atawa badan jang berwoedjoet, dari Amitabha, jang doeloean soedah moentjoel dengen memake toeboeh kasar sa-

PEMILIHAN DALAI LAMA.

bagi Tsongkapa sendiri; sedeng itoe Dalai Lama ada dipandang sabagi pendjelma'an dari Avalokitesvara. Maka menoeroet ini theorie, Pantshen Lama ada djadi pengganti dari itoe goeroe besar Tsongkapa dan djoega wakil dari Amitabha, jang mempoenjai kadoedoekan lebih tinggi dalem kalangan dongeng-dongengan tentang machloek-machloek soetji dari Buddhist Mahayana, dan kadoedoekannya lebih agoeng dari-pada Dalai Lama jang djadi wakil rohani dari Avalokitesvara. Tetapi dalem ka'ada'an jang sabernja itoe Dalai Lama, oleh lantaran kadoedoekannya di dalem iboekota, mempoenjai kakoeasa'an iebih besar dalem oeroesan politiek, hingga digelar *Gyalpo Rinpotche*, „Radja jang Termoelja” — sedeng kawan sadjabatnya, itoe Pantshen Lama, boleh merasa poeas dengen gelaran *Pantshen Rinpotche*, „Goeroe jang Termoelja.”

Kapan salah-satoe antara ini doea Kepala soedah wafat, ada perloe bagi jang laen, jang masih hidoe, mentjari taoe ka dalem toeboeh siapa itoe machloek soetji dari langit, jang woedjoet kasarnja soedah termoesna, merasa senang aken masoek dalem péndjelma'annja kombali. Boeat itoe maksoed nama-nama dari samoea anak lelaki jang terlahir sedikit tempo sasoedah wafatnya itoe Lama Besar, disampeken di-hadepan itoe Kepala Agama jang masih hidoe. Dari itoe sa'antero djoemblah ia pilih tiga nama, jang laloe dimasoekin ka dalem satoe doos emas jang disediaken oentoek ini maksoed oleh salah-satoe Keizer Tiongkok di tempo doeloe Lantes samoea Chutuktus, atawa pendita-pendita paling tinggi dari klooster-klooster jang besar, dipanggil berkoempoel, dan sasoedah berdowa satoe minggoe lamanja, lantes satoe dari itoe tiga nama, jang dipoloeng dalem tiga lembar kertas, didjoempoet oleh Wakil dari Keizer atawa Oetoesan dari Pamerentah Tiongkok seperti tjara menarik loterij, dengan disaksiken oleh itoe Lama Besar jang masih hidoe.

dan samoea pendita-pendita besar jang berhadlir. Itoe anak jang namanja terdjoempoet paling doeloe ialah bakal didjadiken pengganti dari Lama Besar jang meninggal, sedeng doea jang laen, jang tida terpilih, masing-masing digandjar dengen 500 thail perak.

Demikianlah ada penoetoeran dari Professor Rhys Davids, satoe achli tentang Agama Buddha.

Tetapi penoetoeran di atas, jang terdapat dalem *Encyclopaedia Britannica*, ada koerang lengkep, brang-kalih lantaran koetika itoe artikel ditoelis, orang poenja pengataoean tentang ka'ada'an dan adat-kabiasa'an di Thibet, satoe „negri resia,” masih sanget sedikit, hingga maskipoen kasarnja ada betoel, tapi di bagian aloes-nja, itoe pemilihan poenja banjak atoeran jang ketjil-ketjil tapi penting, ada djaoe dari lengkep.

Oepamanja, tida sembarang anak jang terlahir sa-soedahnja itoe Lama Besar meninggal lantes namanja dimadjoeken, hanja diperekxa doeloe dengen terlitit apa pada sa'at koetika itoe anak terlahir ada kadapetan tanda atawa alamat jang manoendjoek kasoetjianja. Djoega itoe Lama Besar jang masih hidoept tida lantes pilih itoe tiga nama dengen sembarangan dari sadjoem-blah nama-nama jang dimadjoeken, hanja itoe tiga anak jang aken dipilih djadi candidaat, ada diambil dari antara jang mempoenjai tanda-tanda soetji lebih banjak dari pada jang laen-laen. Dan itoe doea jang tida terpilih, boekan tjoemah digandjar masing-masing 500 thail perak, tapi djoega biasanja dirawat dalem klooster boeat didjadiken pendita-pendita besar di hari komoedian.

Keterangan jang lebih lengkep dari ini samoea bisa didapet dari beberapa penoelis laen jang lakoeken penjelidikan belakangan, teroetama dari boekoena Madame David-Neel.

(*Ada berikoetnja*).

Gerakan Merajaken Taon Baroe Im Lek.

Satoe gerakan jang didasarken atas Agama Tionghoa sambil menghormatin adat kabiasaan toeroen-me-noeroen, seperti Sam Kauw Hwe, tida bisa lantes menjerah dan mengékor pada poetoesah atawa besluit dari satoe pamerentah jang bisa mengganggoe daa meroesak publiek poenja kabiasaan dan kaper-tjaja'an boeat mendjalanken atoeran agama satjara merdika. Maka dari doeloe dalem ini orgaan kita selaloe tentangin itoe gerakan boeat hapoesken tarich imlek aken diganti oleh Yanglek, kerna tida tjotjok sama atoeran dari oepatjara Khong Kauw dan Hoed Kauw jang pandang harian boelan moeda dan boelan poernama (Tjee-it dan Tjapgouw) sabagi hari-hari besar jang penting goena mendjalanken atoeran agama dan menoetijken diri.

Djoega tarich dan atoeran agama dari golongan Hindoe dan Islam ada didasarken atas perideraan remboelan, hal mana menandaken dalem ini hal kupertjaja'an dari kaoem Sam Kauw tida mentijil sendirian.

Aken tetapi tida tjoekoep djikaloe kita tjoemah maloemken bahoea dalem soal agama ada lebih baek orang tinggal tetep menggoenaken peritoengan Imlek, hanja berbareng dengen itoe kita haroes bantoe djoega siarken sasoeatoe gerakan jang tjotjok dengen ini toedjoean. Maka itoe kita pikir ada kabaekaninja aken maloemken djoega, bahoea koetika pakoempoelan Hoe Lie Hwee di Kertosono adaken pertemoean boeat merajaken Sientjhia (Taon Baroe Imlek) pada tanggal 11 Februari jang laloe, dimana ada beberapa orang telah angkat bitjara, satoe dari antaranja, Toean Liem Thay Tjwan, satoe pemimpin jang terkenal di Djawa Wetan dan Tengah, telah menjataken pikiran tentang peritoengan Yanglek den Imlek dengen tjotjok seperti apa jang kita biasa kamoekekaken. Di ba-

wah ini kita koetip verslag dari Toean Liem poenja pidato jang ada dimoeat dalem *Siang Po* penerbitan 15 Februari :

Toean Liem Thay Tjwan, spreker jang katiga, telah mengoepastentang peraja'an taon baroe dari berbagi-bagi bangsa dari djaman doeloe kala sampe ini djaman tjoemah bangsa T. H. sendiri, kata spreker, jang maoe toekar taon baroe Im Lek diganti Yang Lek; orang moesti toeroet atoeran dari Pamerentah National di Tiongkok boeat rajaken tanggal 1 Januari sebagai taon baroe National, tapi orang tida bisa robah boeat sembahjang pada tanggal 31 December, kerna itoe tida bisa tjoetjok dengen djalannja remboelan, sebab oemoemnja bangsa T. H. sembahjang tanggal 1 dan 15 dari penanggalan T. H.

Bangsa Japan jang dikata paling modern dibenoea Asia, en toch perkara sembahjang tida maoe robah, marika masih tetep sembahjang kaloe tanggal 1 dan 15 Im Lek. Demikian poen bangsa Islam, djoega tida maoe robah taon baroenja, jalah tanggal 1 boelan Soero, dan tentang sembahjang hari Djoemahat djoega tida brani merobah; bangsa Blanda sendiri masih teroes akkoei marika poenja taon baroe ada boelan April.

Dalem oeroesan perdagangan dan social orang moesti menoeroet pemandangan Yang Lek, tapi dalem soeal sembahjang bangsa T. H moesti menoeroet penanggalan Im Lek. Djanganlah bangsa T. H. tjoemah bisa anoet groeboek kerna aliran Barat; apa jang kita aken toeroef haroes ditimbang dañ ditjotjokken, djangan sampe kita kena dibikin bodo!

Taon Baroe Im Lek orang djangan ganti dengen tanggal 1 Januari, kerna tanggal 1 Im Lek ada hari sembahjang paling berarti dari bangsa T. H.

Sakean kira-kira ringkesnja toean Liem Thay Tjwan poenja lezing.